

28 DEC 2002

DR MAHATHIR AKAN CUBA SELESAIKAN URUSAN KERAJAAN SEBELUM BERSARA

PUTRAJAYA, 28 Dis (Bernama) -- Datuk Seri Dr Mahathir Mohamad hari ini berkata beliau akan cuba menyelesaikan semua urusan kerajaan yang memerlukan penglibatannya sebelum bersara Oktober tahun depan.

"Saya nampak banyak orang nak cuba memasukkan kerja tiga empat tahun supaya dapat diselesaikan sebelum saya bersara. Saya akan cuba seberapa yang boleh," kata Perdana Menteri semasa berucap pada majlis sambutan Hari Raya Aidilfitri Kementerian Kewangan di sini hari ini.

Di dalam ucapannya yang banyak berseloroh, Perdana Menteri dalam nada serius seketika berkata masih banyak kerja yang perlu dibuat dalam masa yang singkat, bagaimanapun masa berjalan terlalu pantas.

Menyentuh mengenai rumah terbuka sempena Hari Raya, Dr Mahathir yang juga Menteri Kewangan berkata walaupun sibuk dengan tugas-tugas negara, beliau akan cuba untuk hadir ke majlis-majlis rumah terbuka bagi tidak menghampakan pihak penganjur.

Turut hadir pada majlis itu ialah isterinya Datin Seri Dr Siti Hasmah Mohamed Ali, Menteri Kewangan Kedua Datuk Dr Jamaluddin Jarjis dan Gabenor Bank Negara Tan Sri Dr Zeti Aktar Abdul Aziz.

-- BERNAMA  
MFZ HK MOZ